

# Barbapapa vegn tar ils uffants rumantschs

La renaschientscha da l'URG e ses plans

DA CLAUDIA CADRUVI / ANR

■ Igl è gia mess fil en guglia. Ils uffants rumantschs survegnan proximamain trais novs cudeschs che han gi grond success en autras linguas. L'Uniu Rumantsch Grischun (URG) sa metta suenter ina pausa da tschintg onns puspè en ils stadals. Il mardi saira èn sa radunads nov persunas en il hotel Freieck a Cuira. La pitschna radunanza ha destadà la veglia URG ord la sien ed ha surdà il timun ad ina nova squadra. Rino Darms è il nov president. Analisa Schaniel, Ursin Lutz ed Andrea L. Rassel èn ils suprastants. La nova squadra ha plans concrets. Ella vul edir dus cudeschs da Barbapapa e l'istorgia da l'elefant Elmar en rumantsch grischun. Ils trais cudeschs èn sa cumprovads sin la fiera, ed ils novs responsabels da l'URG han gia dumandà per lubientscha d'edir ils cudeschs.

**Sisti per tschintg onns las activitads**  
Avant tschintg onns ha l'URG sisti sia lavur. La suprastanza aveva dumandà a maun d'ina circulara ils commembers,



La famiglia Barbapapa.

MAD

tge che duai capitar cun l'uniun. Duas terzas dals commembers che han respundì han vulì schliar si l'URG, ha explitgà Felix Giger, l'antierur president. Ma perquai ch'i era avant maun pli che 12 000 francs e perquai ch'ins aveva gist cumenzà cun in'ulteriura translaziun, haja la su-

prastanza decidì da sistir l'emprim ina giada las activitads. Pir l'entschatta da quest onn hajan ins fatg ponderaziuns da schliar si definitivamain l'uniun. Curt suenter haja Rino Darms telefonà ed annunzià l'interess da puspè metter en moviment l'uniun.

## Lectura per ils scolars

La radunanza generala dal mardi passà è vegnida annunziada en las gasettas, damai ch'i na dat uffizialmain nagins commembers pli, ha Darms explitgà. Uss veglian ins dentant prender si contact cun ils anteriurs commembers e guardar da gudagnar novs interessents.

L'intent da l'uniun è tenor ils novs statuts «da promover il rumantsch grischun e ses adiever. Questa mira vegn realisada cun atgnas acziuns e publicaziuns e cun

sustegnair acziuns e publicaziuns en favur dal rumantsch grischun».

Gia la «veglia» URG ha edì cudeschs. Cun translatar cudeschs per uffants e giuvenils en rumantsch grischun ha l'uniun prestà lavur da pionier. Tuttas 13 ediziuns da l'URG èn anc en vendita. I sa tracta d'istorgias, crimis e da cudeschs da la retscha «Egls averts».

Era la nova URG vul procurar per lectura – cunzunt per ils scolars che han uss rumantsch grischun en scola.

## Barbapapa è naschì a Paris

Ils geniturs dad oz èn creschids si cun Barbapapa. La fin dals onns sessanta han Annette Tisone e Talus Taylor – ina studenta ed in scolast – inventà la figura Barbapapa a Paris. Il num deriva dal pled franzos «barba à papa», quai vul dir vata da zutger. Barbapapa è rosa, exact sco la vata da zutger. El ha ina dunna e set uffants. Barbamama è naira, e minga figlia e figl ha ina outra color ed in auter talent: Barbaletta legia gugent,

Barbalix ha mirveglias e vul savair dal tut, Barbabo è in grond artist e pictur, etc.

L'emprim cudesch da Barbapapa è cumparì il 1970 ed è vegnì translata en trenta linguas. La seria da 45 films existava dapi il 1974.

Da preschent datti in revival dals films e cudeschs. Dasperas vegn fatg fatschenta cun t-shirts e products cun la renumada famiglia da comic.